

# La'ó Hamutuk

## Institutu Timor-Leste ba Monitor no Analiza Dezenvolvimentu

Rua Dom Alberto Ricardo, Bebora, Dili, Timor-Leste

Tel: +670-77234330 (mobile) email: laohamutuk@gmail.com

Website: [www.laohamutuk.org](http://www.laohamutuk.org)



Dili, 03 Maiu 2021

Bodik ba : Sua Exelénsia Prezidente da Repúblika Demokrátiku Timor-Leste  
Sr. Dr. Francisco Guterres “Lú Olo”

Cc : Públiku, Primeiru Ministru, Ministru Finansas , Ministru Koordenadór ba  
Asuntu Ekonómiku, Ministra da Solidariedade Social, no media

Asuntu : Prinsípiu Igualdade no Justisa iha Alterasaun ba Lei 14/2020 kona ba OJE 2021

Ho respeito,

La'ó Hamutuk durante ne'e observa prosesu no konteúdu atu altera Lei 14/2020 kona ba Orsamentu Jerál Estadu, no ami apresia vontade Governu nian atu responde ba impaktu ekonómiku ba povu husi Estadu Emerjénsia no dezastre inundasaun. Ita hotu hatene katak foin lalais Parlamentu Nasionál aprova ona mudansa ba Lei 14/2020 kona ba Orsamentál Jerál Estadu 2021. Liu husi karta ida ne'e ami hakarak atu hatudu ami nia preokupasaun balu, liga ho prinsípiu igualdade no justisa. Ami espera katak perspetiva sira ne'ebé ami hato'ó sei ajuda Sua Exelénsia no ofisiál sira seluk atu konsidera alterasaun ba Lei OJE 2021, ba implementasaun no medidas ne'ebé matenek hodi benefisia povu Timor-Leste.

Iha dia 12 de Abril 2021 La'ó Hamutuk entrega Submisaun ida ba Membru Parlamentu, no submisaun ne'e aneksu ba karta ida ne'e. Ho pontu importante sira ne'ebé ami husu Distintu Deputadu/a sira atu altera ba proposta mudansa refere hodi bele avansa Timor-Leste iha direisaun justisa sosiál hanesan tuir mai:

1. Kalkula montante subsídiu ba família hotu hotu bazeia ba número membru uma kain, laho referénsia ba ema nia saláriu ka rejistrasaun ho Seguransa Sosiál.
2. Konsidera katak cerca sanitária husi Estadu Emerjénsia no dalan nasional ne'ebé hetan estraga halo susar ba hirak ne'ebé mak presiza halo viajen ba munisípiu seluk atu hetan apoiu husi família, presiza inklui sira ne'ebé hela iha fatin aluga ka fatin ne'ebé independente husi família, hodi bele asesu mós ba subsídiu estraordináriu.

Ami konsidera katak la justu atu hametin dezigualdade liu husi fó apoiu boot liu ba sira ne'ebé hetan osan ona kompara ho ema ki'ik no kiak sira ne'ebé seidauk partisipa iha ekonomia formal. Objetivu husi subsídiu estraordináriu mak atu aseguira katak ema hotu bele hetan subsídiu atu sustenta sira nia moris durante tempu susar nia laran, liu-liu ba kondisaun agora. Ami hanoin katak la iha razaun atu fahe montante diferente durante tempu emerjénsia.

Situasaun ida ne'e sa'e urjente liu, tanba kazu Covid-19 aumenta lalais, no polítika konfinamentu agora en vigor. Prosesu atu rejistu iha Sistema Seguransa Sosiál, ka halibur dokumentu sira atu prova katak ema iha duni direitu atu sai benefisiáriu, sei fó risku ba ita nia comunidade. Sistema apoiu sosiál la bele forsa ema atu hili ida husi sira nia saúde no sira nia direitu atu simu apoiu, no la bele enkoraja ema atu la kumpre ho regras konfinamentu.

Konsidera ba situasaun atuál, no nesesidade atu evita prosesu burokratiku ne'ebé fó todan ba povu, ami husu nafatin atu aplika fali ideia Subsídiu Uma Kain ne'ebé implementa iha tinan kotuk, maibé halo mudansa balun atu asegura katak ema hotu hetan benefisiu ne'ebé hanesan.

Detallu sira husi ami nia sujestaun kona ba oinsá mak atu asegura katak subsidiu estraordináriu bele fó benefisiu ba povu tomak, ami aneksa ho Submisaun ba Parlamentu iha fulan Abril.

Ami hein katak ami nia hanoin sira, hetan konsiderasaun husi Na'i Prezidente hodi informa ba Governu no Parlamentu molok promulga OGE retifikativu 2021 ne'e. Ami hein katak ho Knaar competente ne'ebé Sua Exelénsia iha bele foti medida no desizaun ne'ebé di'ak hodi garante bein estár povu hotu. La'ó Hamutuk rekomenda ba Sua Exelénsia Prezidente da Repúblika atu promulga lei alterasaun ida ne'e, no espera katak ita nia sujestaun sira, hamutuk ho Sua Exelénsia nia apoiu, bele ajuda governante sira atu implementa medidas urjente hirak ne'e ho justu liu.

Mak ne'e de'it ami nia karta ba Sua Exelénsia Prezidente Repúblika, ami prontu atu fornese informasaun detallu no partisipa iha audiénsia bainhira Nai Prezidente presiza. espera Sua Exelénsia bele konsidera ami hanoin sira ne'e, obrigadu wa'in.

Ami mak saran lia,



Marta da Silva



Celestino Pereira Gusmão

**Reprezenta Ekipa Peskizadór/a La'ó Hamutuk:**

Bree Ahrens, Elizitaria Febe Gomes, Charles Scheiner no Mariano Ferreira